



CELEBRACIÓN EN OS COTOS (na igrexa)

17 de abril do 2025

XOVES SANTO



NON MÁIS
VIOLENCIA
DE XÉNERO



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1

1.- ENCONTRO DA COMUNIDADE



SAÚDO DE BENVIDA

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Xuntámonos neste día de xoves santo, igual que fixo Xesús cos discípulos e coas mulleres que os acompañaban. Naquela mesa compartida El quixo que se fixera memoria da súa vida así: compartindo en comunidade pan e viño arredor da mesa.

Esta é a razón pola que, hoxe día de xoves santo, nos reunimos arredor do altar, pois querendo facer memoria de Xesús, compartimos o seu pan, que para nós é PAN de VIDA.

Tamén Xesús, naquela xornada, lles propuxo un xeito de vivir: amarse uns a outros coma irmáns.

Agora, esta, é a celebración á que Xesús nos convida.

🎵 **nº 1 Onda ti, ou Unha xuntanza de amor**

2

ACTO PENITENCIAL


Celebrante: *Nesta mesa non podemos participar de calquera xeito, pois é unha mesa de irmandade, e os nosos feitos, ás veces, están lonxe do ser IRMÁNS.*

A soidade de moitos maiores, os muros aos refuxiados, os silenzos da violencia de xénero, os abusos na igrexa, e agora o escándalo da violencia en Palestina, dinos que temos moito do que pedir perdón.

Monitor/a

- ✓ Porque sempre buscamos excusas para non compartir cos demais a nosa vida, e eu e o meu é o único que me importa. Señor, téndenos a túa man
- ✓ Porque sempre buscamos excusas para non sentar con todos na mesa da vida, e son moitas as persoas rexeitadas e esquecidas. Cristo, téndenos a túa man
- ✓ Porque sempre buscamos excusas para xustificar as nosas comodidades e faltas de compromiso. Señor, téndenos a túa man

Celebrante: *Deus, que nos quere ben, ten piedade de nós, dos que teñen un lugar no noso corazón e na nosa vida, de todos os que están a sufrir a morte dunha violencia escandalosa. A todos nos acolle, nos concede o seu perdón e nos leva á vida eterna. Amén.*



Celebrante *Hoxe é un día especial, un día de festa que compartimos como igrexa de fogar, pois o Señor quixo quedar connosco a través do seu corpo e do seu sangue, e quixo que o lembráramos xuntos compartindo pan e viño arredor da mesa.*

♪ nº 2 Gloria

ORACIÓN PROPIA DO DÍA

Celebrante:

Deus, noso Pai, hoxe celebramos facendo memoria da cea na que o teu Fillo Xesús, antes de morrer de nosos o banquete do seu compartir e benquerer.

Fai que pola participación en tan grande misterio recibamos a plenitude do amor, sabendo agradecerche a vida de cantos comparten mesa e pan á nosa beira.

Pedímoscho por Xesús, teu Fillo e Irmán noso, que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón



LECTURA DA CARTA DE SAN PAULO AOS CORINTIOS

Irmáns, eu recibín do Señor, e transmitinvos tamén a vós, que o Señor Xesús, na noite en que o entregaron, colleu pan e, despois de dar grazas, partiuno e dixo:

—«**Isto é o meu corpo, que se entrega por vós; facede isto en memoria miña.**»

Do mesmo xeito, despois de cear, tomou a copa dicindo:

—«**Esta copa é a Nova Alianza, no meu sangue; cada vez que a bebedes, facédeo en memoria miña.**»

Polo tanto, cada vez que comedes este pan e bebedes esta copa, anunciades a morte do Señor, ata que El volva.

Palabra do Señor

🎵 **O pouco que Deus nos dá** SALMO

(en pé) Leccionario I B páx Xn 13, 1-15 EVANXEO

PROCLAMACIÓN DO SANTO EVANXEO SEGUNDO XOÁN

Daquela, mentres Xesús compartía a cea, cos seus mellores amigos, díxolles:

- Como me amou o Pai, así vos amei eu; permanecede no meu amor. Dígovos estas cousas para que a miña alegría estea en vós e a vosa alegría sexa plena.

Este é o meu mandamento: que vos amedes uns a outros coma eu vos amei.

Ninguén ten amor máis grande ca este: que un dea a súa vida polos amigos. E vós sodes amigos meus se facedes o que vos mando.

Xa non vos chamo servos, a vós trateivos de amigos, pois todo o que lle oín a meu Pai déivolo a coñecer.

Non me escollestes vós a min, senón que vos escollín eu a vós; e púxenvos para que vaiades e levedes froito e o voso froito permaneza.

Palabra do Señor

(sentad@s) gardamos uns instantes de silencio para acoller a palabra no corazón



(en pé)

ORACIÓN UNIVERSAL

Celebrante Coma seguidores de Cristo, imos pedirlle ao Pai forza para construír a igrexa do fogar e do mundo, en irmandade, tal como quixo e fixo Xesús, e facémolo dicindo:

ÉNCHENOS, SEÑOR, DO TEU AMOR

Monitor/a:

✓ Mirando as feridas da violencia, queremos unha igrexa que sexa fogar de PAZ, para que todas as persoas poidan manter a esperanza dun mundo mellor, oremos

✓ Mirando o esquecemento de tantos e tantos maiores, queremos unha igrexa na que todas as persoas sexan respectadas, oremos

✓ Mirando os muros e as alambradas, queremos ser unha igrexa que abra horizontes de acollida, sen medos a quen pensa, vive ou reza diferente, oremos

✓ Mirando tanto individualismo, e tanto “cada un ao seu”, queremos unha igrexa COMUNIDADE, na que nos sintamos implicados para dar unha man, oremos

✓ Mirando tantas persoas que o fan ben, queremos ser igrexa de CARIDADE na que non decaian os esforzos á beira dos pobres e necesitados, oremos

Celebrante: Deus noso Pai, acolle neste día o que sinceramente che pedimos, e acóllenos un día na mesa do teu Reino. Pedímoscho por Cristo noso Señor. Amén

Poñemos enriba do altar o copón co pan que imos compartir en lembranza da Última Cea de Xesús

3.- LITURXIA DA CEA DO SEÑOR

MONICIÓN COAS MANS E COAS FOTOS

Celebrante: Neste día de XOVES SANTO, queremos poñer enriba do altar unhas fotos da guerra, e queremos poñer tamén unhas mans que nos lembren a todas as persoas que non teñen sitio nas mesas da vida.

Son as mans de homes e mulleres aos que non se lles deixa partir e compartir o pan, e non son libres para sentarse na mesa común da igrexa e da humanidade.

Nós, coas fotos e coas mans queremos convidar a esta mesa de Xesús porque só así podemos sentirnos convidados tamén nós.

Son as mans feridas dos veciños e veciñas de Palestina, son as mans baleiras dos refuxiados, son as mans arrugadas dos maiores, son as mans inocentes dos que sufriron abusos, son as mans femininas das que sofren violencia de xénero, son as mans curtidas da terra mal coidada.

(Varias persoas soben para o altar as mans e as fotos)

4.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Convidados por Xesús compartimos arredor desta mesa con todas estas vidas que acabamos de traer ao altar. Fiándonos del comprometémonos a ser testemuñas cribles de irmandade, e confiados poñémonos nas mans de Deus Pai rezándolle: NOSO PAI ...*

SIGNO DA PAZ

Celebrante: *Neste día, Xesús dános un mandato novo "amádevos uns aos outros como eu vos ameí".*

Hoxe a paz ten que significar o esforzo por amar, acoller e comprender a todas as persoas.

Os nosos desexos de paz para todos mostrámoslos nas nosas mans feridas e escandalizadas no medio de tanta violencia. Que lonxe aínda estamos dos soños de irmandade de Xesús. Fagámolo ben e démonos a paz.

COMUÑÓN

Celebrante: *. A Última Cea de Xesús axúdanos a construír un mundo que quere amar e facer ben aos demais para superar todo aquilo que separa e divide. Ditosos, nós e todos, pois somos convidados a este pan do Señor.*

Señor, eu non son merecente de que entres no meu fogar, mais unha palabra túa abonda para me salvar

♪ n° 4 Ti elo pan do ceo

4.- ORACIÓN FINAL, AVISOS E DESPEDIDA

Esta oración faise co Santísimo enriba do altar

Celebrante: Deus Noso Pai, Ti, que nesta vida aliméntasnos na mesa do teu Fillo, concédenos ter sempre un corazón agradecido con todos os parentes, amigos e veciños cos que gozosos compartimos moitas veces as mesas das nosas casas.

Concédenos tamén participar na plenitude do banquete da vida eterna. Por Cristo noso Señor. Amén.

Coma Xesús arredor da mesa, queremos dar vida no noso fogar, na nosa comunidade, no noso rural, cos nosos veciños e veciñas.

Con Xesús queremos dar grazas ás persoas que se desviven polos demais, na hora da enfermidade, no tempo da soidade e na frustración da morte sen paz.

Con Xesús queremos achegarnos á vida dos que malviven coma refuxiados, das que sofren violencia de xénero, dos que se senten feridos de morte na guerra.

MONICIÓN AO TRASLADO

Celebrante: Mañá, Venres Santo, Xesús morre por todos, e nese día non hai ningún Sacramento. Pero hoxe queda con nós, (nun sitio aparte), como pan para os enfermos e os necesitados, e para ser o noso alimento mañá.

***Se hai monumento faise agora o traslado,
se non hai déixase estar o copón enriba do altar.***

♪ n° 3 Pan do ceo, pan de vida

ORACIÓN ANTE O SANTÍSIMO

Lemos entre todos a oración n° 5:

Xesús, non téns mans,
tés só as nosas mans para construír
un mundo onde haxa xustiza.

Xesús, non téns pés,
tés só os nosos pés para por en marcha
a liberdade e o amor.

Xesús, non téns labios,
tés só a nosa boca para anunciar polo mundo
a boa noticia dos pobres.

Xesús, non téns medios,
tés só o noso obrar para lograr
que todas as persoas sexan irmáns.

Xesús, nós, somos o teu evanxeo,
o único que as persoas poden ler,
se as nosas vidas son obras e palabras túas.

Xesús, danos a túa forza
para facer medrar os nosos dons
e facer ben todas as cousas.

♪ n° 3 Pan do ceo, pan de vida

***Se non hai monumento gardamos no sagrario
o copón co pan que nos sobrou,
deixamos a porta do sagrario aberta.***

*Avísase das celebracións destes días insistindo na
importancia de participar na celebración da vixilia
pascual (ver folla do mes)*



Os Cotos



Palabras do evanxeo deste Xoves Santo

Naquela cea dixo Xesús:

“Facede isto en memoria de min”

“Deivos un exemplo para que así fagades tamén vós”

*Que teñamos unha boa noite
e o Señor nos bendiga, † nos garde de todo mal
e nos leve ao seu fogar de vida eterna. Amén*

*Podémonos ir en paz.
Dámoslle grazas a Deus*